

Powšitkowne WOZJEWJENJA

njedźelu, 2. julija 2017

Zetkanje Częstochowskich putnikow

Tež lětsa pozbudža farar Beno Jakubaš, so w serbskej skupinje na putnikowanje z Warszawy do Częstochowy podać. Hić smě kóždy sobu, kotryž je 18. žiwjenske lěto docpěl. Termin putnikowanja je wot 5. do 15. awgusta. Zajimcy njech so hač do njedzele, 2. julija, pola fararja Bena Jakubaša w Radworju přizjewja, telefonowe čisło (0 3 59 35) 2 07 13. Zetkanje wšitkich putnikow budže wutoru, 4. julija, w 19.30 hodź. w Radworju na farje.

Zetkanje putnikow do Krupki

Putnicy do Krupki zetkaja so tutu njedźelu, 2. julija, po nyšporje w Chrósćicach na farje, štož je za wšitkich nowačkow winowatosć. Nyšpor započnje so w 14 hodź. Putniska Boža mša w Krupce budže srjedu, 26. julija, w 10 hodź.

Serbske kemše w Praze

W cyrkwi swjateje Marije dobyća (Marie Vitězné) na Karmelitskej w Praze, hdžež je postawa Praskeho Jězusedźatka, změje Radworski farar Beno Jakubaš srjedu, 12. julija, w 11 hodź. serbskorěčnu Božu mšu. Wšitcy zajimcy su k tomu wutrobnje přeprošeni.

Znowa Gig-festiwal w Róžeńće

W Róžeńće wotměje so wot pjatka do njedzele, 21. a 23. julija, Gig-festiwal. Wón zahaji so pjatk, w 19 hodź. z Božej mšu w hnadownej cyrkwi. Po kemšach pokaza so film „Outcasts“, kotryž rozprawja wo džěle franciskanow wobnowjenja z New Yorka. Sobotu popołdnu přewjedu so wot 14 hodź. workshopy, wot 17 hodź. koncert ze wšelakimi mjezynarodnymi skupinami. Mjez nimi budže rockowa skupina Cardiac Move z Awstriskeje runje tak kaž Edwin Fawcett a gospelowy chór z Jendźelskeje. Za kóždeho budže něšto pódlu – pop, soul, rap a rock kaž tež kabaret, zdžěla zarjadowarjo. Swjatočnu Božu mšu njedźelu, 23. julija, w 10 hodź. sćelak Radio Horeb originalnje přenjese. Budže to tón dzeń jenička njedźelna Boža mša na hnadownym městnje. Kemšam přizamknje so brunch. Wot 14 hodź. přewjedu so dalše workshopy. W 19 hodź. budže hudźbny nyšpor w cyrkwi. Z tak mjenowanej „chwalbnej party“ z Joe Melendrezom a DJom Amandom so Gig-festiwal zakónči. Wšitcy – młodostni runje tak kaž starši a swójby z džěćimi – su wutrobnje do Róžanta přeprošeni. Nadrobny program je w interneće na stronje www.gigfestival.de wozjewjeny.